



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 8

Linük Tir Murmu-i linük 5 nungi
ktdangsertem kuli kaket agizük

Jordan Pickford-i Everton den
tenangzüktepba yanglushi



VOL. XX NO. 134 (ADOK 134)

DIMAPUR

KÜPTOKNÜ (SATURDAY)

TSÜKLAI (FEBRUARY) 25, 2023

₹ 5.00

Ao Senden-i Aitsür

Ao senso tajung Chungtia yimtiba nungi Wb. IMKONGJEBBA KICHU temeim aser tapayu makai anizüka bener oa tepseta toktsüba Feb. 22, 2023 anogo tasü mang arem nung ngutetba osang angashidang Aor rangben aoksar aser iba asoshi Ao Senden kukua aitsür.

Tanü asen Nagaland General election agidang pei aginüba lenir kar shimtetsü merangdang tashiyim benshia asen Aor sobaliba dak maketba tapayu makai meimchir senti taküm tepsetepdang tangar kin tem dang aseni yimya tamajungtiba ka songtetogoni ta nemjemer! Ao senso tejangja azü aketeremibo item maparen asoshi kanga akseta bilemer. Meimchir senti taküm ka zübazüba tepsetteptsüsa tanü asen nübur rongnung iba ama shisatsü aketer alirtem yabo tekaraba nung bangdakpuri bushiteta meimchirtem tansütsü otsüsütsüsa ozü ng tapet agi temerenshi agütsütsüla ta Ao Senden takhangba agütsür.

Maneni lephsia, Election anogo ka ana tsüngta tembangatoksü. Iba maparen ajanga Aor kija, Yimden aser lokti meraksadaksütsü asoshi Ao sünak abener ajaki kanga kümdanga ochiba nung tim lenmang ajanga iba election nung shilem agitsü atema Ao Senden mendenti ajanga maneni ayimoktsür.

(Chubawati Longchar)
President

(Imtipokym)
Gen. Secretary

Congress-i senzuka yutsü saka BJP-ibo NE ya 'Ashtalakshmi' ama züngshir: PM Modi

Dimapur, February 24, 2023

(TYO): Congress-i Northeast ya ATM ama amshi saka BJP-ibo state 8 ya 'Ashtalakshmi' (Goddess Lakshmi dak keta aliba temoatsü ti) aser onoki yimjung aser terenlok atema inyaker, ta Prime Minister Narendra Modi-i ashi.

NDA sorkari Nagaland nung teti atema yimjung bener arutsü aser iba ajanga state ajungalen nungi Armed Forces (Special Powers) Act, 1958 agientsü atema inyaker ta Hokolbarnü Agri Expo, 4th mile, Chumukedima nung BJP-NDPP külem sentong

ka nung jembidang PM Modi-i ashi.

"Külem senso dak temulung melemi iba linük ya ktdangsüa moutettsü saka senso ajak akhümtsübuttsüla aser parnok indang khurettem akoktsüla.

(Maneni tapak 2 nung...)

Nagaland nung Feb 27 'paid holiday' asütsü
Tanü election nüboyimba maparen tembanger

Kohima, February 24, 2023

(TYO): Nagaland nung mapa inyakertem asoshi February 27 polling anogo 'Paid Holiday' asütsü ta home department-i metetdaksüogo.

Government/ PSUs/Banks/ Financial Institutions/Industrial undertakings/Private aser Business Establishments nung inyakertem iba anogo polling maparen nung shilem agitsü atema metetdaksür, ta principal secretary and home commissioner Abhijit Sinha-i

ashi.

Ajisüaka, mapai maoba ajanga lendong mesüra takoksa angutsüsa tensa ajurutsü mapa inyakertem nembo sodi magütsütsü ta paisa ashi.

14 buba Nagaland Legislative Assembly indang General Election atema nüboyimba maparen asung Honibar nikongdang 4:00 ako nung tembangtsü.

February 25 nikongdang 4:00 ako nungibo nisung shinga nema election dak sendakba lokti


senden mesüra yimdong sema senzüba sentong ayonga magidaksütsü DC aser District Elections Officer tem nem tetuyuba agütsüogo.

Nüboyimba mapang tembangba sülen cinematograph, television mesüra item mesükba apparatus ajanga election indang osang kecha melemsatsü. Maneni, political party lennirtemi nüboyimba mapang tembangba sülen constituency toktsür aotsüla, ta CEO ajanga metetdaksüogo.

NATIONALIST DEMOCRATIC PROGRESSIVE PARTY (NDPP)

Facta non Verba

- PROMOTING NAGA SOFT POWER
- PUSHING CREATIVITY & INNOVATION
- PROPELLING BRAND NAGALAND



**NAGALAND - TOWARDS A
STATE OF EXCELLENCE**



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

"Sen agi Vote alir lenir akümtsü merangba jagi na lenir asütsü metemsü ta jangjatsür" Anonymous

- Ungma Baptist Arogo Laishir Telongjem Clean Election Tayongzükba

Temelenshi arutsü asoshi pei senti vote shisa ka-a agüjang: Lanukaba

Mokokchung, Tsüklai/ February 24 (TYO): Naga People's Front (NPF) manifesto nung jangja jangjaa shia aliba ama Naga lima nung temelenshi nungtaker, anungji temelenshi bener arutsü asoshi NPF Mokokchung Division-i lanur nübo tajung candidate asem 25th Mongoya A/C nungi Moasangba Jamir, 28th Koridang A/C nungi Major Toshikaba aser 29th Jangpetkong A/C nungi Imjongwati, par asem yokdagi, ta tanü NPF Mokokchung Division Office nung NPF Farmers Wing (Central) President & NPF Mkg. Div. Campaign Incharge Lanukaba-i Mokokchung nung NPF Mkg. Div-i osang zülurtem den mensem ka ayongzüka akaba mapang ashi.

Lanukaba-isa Naga lima nung election merük merüka agitsü asoshi Nagaland Baptist Church Council, Ao Baptist Arogo Mungdang aser Arogotem ajaki sarasademdagi, anungji nüburtemia iba election yimjung nung rongrong madoki katettsüsa tangatetba tajung nung shilem agitsüla, ta ashi. Paise Missionary-tem, Pastor-tem aser Arogo nung tenzükertemi Polling anogo anepdang dang arua sarasademtsür oadoker aser iba sülenjibo rongrong adoker, anungji election yimjung nung tembangtetsü asoshi parnoki anogo tepeyong atadaksüner, ta shisem. Polling station-tem nung Polling Agent-temi Proxy Vote

aitba atema tasü ita noktaksüla aser Presiding Officers-tem tasü ita ketdang asütsüla aser ibaji ajanga Free & Fair election-ji agitettsü tamang akar, ta Lanukaba-isa ashi. Tang election yimjung aser tesünep nung agitetdaksütsü asoshi NPF Mkg. Division taginüba tulu lir, anungji nübur ajaki shilem tajung agitsü asoshi tangatetba lemsatapa osang prokshitsü asoshi Mokokchung nung osangzülurtem jaokba lir, ta metetdakja ashi. Anungji Naga lima nung election yimjung akatsü aser temelenshi arudaksütsü asoshi nübur ajaki shisa kaa pei senti vote agüjang, ta NPF Farmers Wing(Central) President Lanukaba-isa ashi.

Congress-i PM Modi nem meyiptsür

Dimapur, February 24, 2023 (TYO): Congress-i Delhi nungi remote control ajanga Nagaland anishiba aser ATM ama north east state tem amshi ta Prime minister Narendra Modi-i jembiba aitsür ta Congress-i metetdaksü. "Remote control ya BJP indang inyakyim lir. Parnoki iba inyakyim ajanga democracy nungi autocracy agi melener aser parnoki linük nung party ajak samatsütsü meranger. Parnoki remote control ajanga Meghalaya anishioigo aser state nung parnok jenjang yanglutsü

atema BPP amshi. Tang BJP-i Nagaland ajanga azüoktsü atema inyaker" ta AICC Media Coordinator-Nagaland Mahima Singh-i ashi. "BJP-i regional party tem dang ATM ama inyaker aser iba sülen tashiyim amshir. Iba inyakyimji Madhya Pradesh, Maharashtra, Manipur, Goa, Uttarakhand aser Jammu and Kashmir nung asenoki nguogo" ta lai ashi. "BJP-i Nagaland nung Khristantem atema kechi tebilemba lir aser Uniform Civil Code atema Nagaland nung kin

17 atema kechi bilemer ta onoki asüngdang saka parnoki ola madoker" ta Mahima-isa ashi. Taküm election atema BJP indang manifesto nung Naga yimten latettsü indang kecha shia mali aser parnok indang taoba manifesto samaogo, ta laisa metetdaksü. "Iba sorkar anema jembirtem dak atalokba asenoki meteta lir. Yashi ozü lennir Pawan Khera dak atalokbaji democracy tepsetba liasü aser iba ya BJP indang inyakyim lir" ta Mahima-isa shisem.

Congress-i senzüka yutsü saka BJP-ibo NE...

Taoba mapang Northeast nung telemsa indang politics liasü saka tangbo onoki sorkar ketdangsubaren tajung agi melenogo. BJP-i tamangba yimsü mesüra tesem dak rangloker nisungtem bendanga mamshir" ta PM Modi-isa metetdaksü. Nagaland nung Congress sorkar alidang yimten tensa mejungi liasü. Congress-i Delhi nungi Northeast madak yimsü asü aser terenlok indang sen miimzüka agi. Delhi nungi Dimapur tashi Congress-i 'dynasty politics' nung temulung agüja inyak, ta paisa ashi. "Delhi nung Congress lennirtemi Nagaland indang khurettem mangu ama dang toktsü. Küm 10 tsüngda Northeast yamai melenshitsu ta nisung shingaiya mebilem liasü" ta Modi-isa shisem. "BJP-i ochimashi mapa nung tetsükdaksü ka agütsüogo aser ibaji beneficiary indang bank accounts-i sen indangindanga yokba lir. BJP-i aniba National Democratic Alliance (NDA) ajanga Nagaland madak ketdangtsü atema teinyaktsü asem shimogo- itemji yimjung, tejakleni aoba aser azükaru lir" ta paisa ashi.

Central government scheme shiai tetsürtem, lisopurtem aser sensakertem dak rangloka lir. BJP-isa Nagaland nem mezüngbuba tetsür Rajya Sabha MP agütsü, ta PM Modi-isa metetdaksü. Nagaland nung lanur aika temai adokogo. Onoki Northeast nung infrastructure renloktsü atema inyakogo. Onoki temelenshi bener aruogo. Onoki tourism nungi technology aser sports nungi start-ups tashi wadang balala nung lanurtem yaritsü, ta paisa nangzük. 'Aatmanirbhar Bharat' yangertsü atema "sabka saath, sabka vikas, sabka viswas sabka prayas" tim lenmang nung odar aser tanü sorkar scheme aser mapa balala ajanga sensotem ajangzüker, ta Nagaland Chief minister Neiphiu Rio-ia ashi. "Prime Minister Narendra Modi lenisüba kübok Naga nung aser India tanüngba tsüngda tali angatettepogo aser iba ajanga asenoki yimten olemtep tajung agiteter. Asenoki Framework Agreement aser Agreed Position sign sütepba aser Armed Forces Special Powers Act agienba nguogo" ta CM Rio-isa metetdaksü.

(Tapak 1 nungi...) "Onok indang tongti teinyaktsüji Naga yimten latettsüba lir. Kobi melii India sorkar aser Naga yimten teloktem tsüngda angatetteptsü imlar" paisa ashi. Nagaland-i teti Centre indang teyari kanga nungdaker kechiyong asenok tanga state tem ama masü. Iba jagi onoki Centre dang Nagaland nung terenlok mapatem inyaktsü mepishir, ta Rio-isa shisem. "NDPP aser BJP teloktepi menden 60 nungi 40 tema angutsü aser onoki tanga political party tem teyari menüngdaksü. Chief Minister Neiphiu Rio lenisüba kübok onoki sorkar akümtsü aser state nung yimjung aser terenlok atema sorkar asütsü" ta Deputy Chief Minister Y Patton-ia ashi. Iba sentong nung Dimapur-I A/C MLA & BJP candidate Tovihoto Ayemi, Dimapur-II A/C MLA & NDPP candidate Moatoshi Longkumer, Ghaspani II A/C MLA & NDPP candidate Zhaleo Rio aser Dimapur-III NDPP candidate Hekani Jakhalu nungeria o jembia aser Ghaspani-I MLA & BJP candidate Jacob Zhimomi-i tesentepertem pelaa agizük.

PUBLIC NOTICE
 Registered office: Landmark, Race Course Circle, Vadodara 390 007.
 Corporate office: ICICI Bank Towers, Bandra-Kurla Complex, Mumbai 400 051.
GOLD E-AUCTION CUM INVITATION NOTICE
 Tsünglangen agüja aliba tapur dang gold ornaments tenüng nung sen temonoktsü aliba menokdang ta metetdakja aru. Parnoki ICICI Bank Limited ("ICICI Bank") nungi ("Facility") agi. Parnoki sentsüh memonoktet nung onoki Mar 08, 2023 nü nangzüka aliba gold ornaments ya E-Auction asütsüsa akumer. Jelia osang magütsü account/ E-Auction anogo melentsü ICICI Bank dak tashi lir. Auction ya - <https://jewel-auction.procreetiger.com> nung anüngdang 12:30 ako nungi nikongdang 3:30 ako tsüngta agitsü. Terms and condition tejangja metettsü asoshi agüja aliba website nung angutsü. Sen apur sür alinungbo, conditions ajak senmanger den kasa alitsü.

Loan A/C No.	Customer Name
Branch Name: Dimapur	
047605000618	Vikali Wotsa
047605000680	Chuvau Phom

Date : 25.02.2023
Place : Dimapur
S/d Authorised Officer For ICICI Bank Limited

Nagaland nung sen crore 48 tema puogo

Dimapur, Tsüklai/February 24 (TYO): Nagaland Legislative Assembly 2023 atema General election sangdongba anogo nungi tenzüka Central aser State nungi Enforcement Agency

balalai senotsü, temesepba y/ mozü aser item mesükba osettsüset February 21, 2023 nü tashinung apuba sen 48,77,34,159 jenjang alitsü, ta Chief Electoral Officer, Nagaland sangdong ka ajanga ashi.

- Osettsüset balala apuba tejangja yamai alitsü:**
- Cash = Rs. 56993075/-
 - IMLF (86037.019 Litres) = Rs. 49693092/-
 - Drugs/Narcotics = Rs. 328642410/-
 - Freebies/other items = Rs. 52403917/-
 - Precious Metals (Silver-0.02332 kgs) = Rs. 1665/-
- Maneni February 23, 2023 nü apuba yamai - sen 1,91,200/-, y/ sen 4,75,930 jenjang liter 939.29, temesepba mozü sen 1,00,47,500 jenjang, Freebies aser danga oset sen 1,73,250 jenjang - ajak agi sen 1,08,87,880 jenjang alitsü.

KSC Batch of 2007 ajanga khukhua aitsür

Dimapur, Tsüklai/February 24 (TYO): Kohima Science College, Jotsoma nung Class of 2007 nungi tembar aser külem batch pur Asür Imkongjeba Kichu tepsetba asoshi khukhua aitsür, shiba engineer ka liasü aser law degree agir Chungtia Students' Union nung taoba mapang tir inyaka liasü, ta sangdong ka ajanga ashi.

Compound Lanur Telongjem nung tatong tir (2021) aser tir (2022) ka ama inyakba ajanga pa dak sempet aliba sayur. Onoki ketdangtsür dang teimla tajung aliba lanur ka dak milen zükseptsüba atema tekeraba nung ochi agi tajungtiba nung bushisüngdangtsü ajungshir. Iba ama tasü mait mapa ya asen lokti nung alitsü menüngdak aser iba ama mapa tamajung inyakba bushisüngdang nung temolung agüja inyaktsü ayongzüker, ta sangdong ajanga ashi.

February 22, 2023 nü asükjang moronga meimchir masü ama inyakba ajanga onok kanga aoksar, süngmanger aser jashir. Iba ama asaa mapa tamajung inyaka tepsetba ajanga asen lokti nung lenir ka aser asen nübur asoshi kasa temeden aser maongka atema anibelem mesasai inyaker ka samatsüogo. Onoki teti meima aliba adianu aser tembar Asür Imkongjeba Kichu ya ajemalur, ochishir aser dangar dang aria bilemba nisung ka liasü. Pa dak sasa-pela jakla ajanga ajak den tesendaktep tajung yanglu aser pa dang Achi ta jaa liasü, aser pa meteter ajaki pa sakloka liasü, ta ashi. Pa dak lenir sempet tajung liasü aser tarutsü nükla tajung liasü. Pa Chungtia Students' Union nung tatong tir (2016), tir (2017-2018), Executive züngsem (2018 nungi tasünü tashi) aser Sabangya

Mapa tamajung inyaker nem tapet obendang agütsütsüla. Yimjung melena azüdokshitsu jangraba onoki aitsür. Azüdokshi agi azüdokshi tali adokdaksür aser yimtenren mesüra loktiliba nükjidong ataloktsü asoshi yamai inyaktsü khenyongi kuli maka, ta ashi. Mangyimer kibong den temolung taroktiba nungi asükhu lemsateper. Iba ama mangyim tia nung asen Tsüngremi ner kibong nem tesunep, temoatsü aser anisüngzük agüjang ta sarasademtsür. Asür Imkongjeba Kichu dak yimya tajung aliba, mapa tajung inyakba aser sasa-pela yimyatem konang amai lir aser itemji kodanga mamashitsu, ta Class of 2007, Kohima Science College, Jotsoma ajangasa ashi.



Nagaland Legislative Assembly 2023 atema General Election asoshi requisition süa aliba gari tem February 24, 2023 nü Deputy Commissioner, Chumoukedima office anasa Chumoukedima ground nung duty aotsü adenshia aliba noksa nung angur.



February 24, 2024 nü Civic Centre, New Delhi nung Municipal Corporation of Delhi (MCD) Standing Committee election agidang tangokba noksa nung angur. Noksa nung Delhi Mayor, Shelly Oberoi-a angur.

Covid vaccine campaign ajanga India-i nisung million 3.4 kümzükogo

New Delhi, Tsüklai/February 24 (Agencies): India-i linük tesem ajaklen Covid-19 vaccination campaign ayongzüka agiba ajanga nisung million 3.4 dak tema kümzükogo, ta Stanford University-i report ka ajanga metetdaksü.

Covid vaccination campaign ajangasa rongsenkettsüung tsütsülena US dollar billon 18.3 takoksa angutsü aliba nokdangtetogo, ta Stanford University & Institute for Competitiveness indang 'Healing the Economy: Estimating the Economic Impact on India's vaccination and related issues' report ajanga metetdaksü.

Hokolbarnü Union Health Minister, Mansukh Mandaviya-i iba report ji sayatsüogo.

Mandaviya-i, 2020 küm January ita nung World Health Organization (WHO)-i Covid-19 ya 'public health emergency' ka, ta mesangdongba mapang nunga India-i iba wara nokdangtsü atema lenla balala

nung renema liasü, ta metetdaksü.

'The India Dialog' senden nung 'Economic Impact of Vaccination & Related Matters' onük jembidang Health Minister-i, "Ato kilonser, Narendra Modi lenisüba nung India-i coronavirus anema raratsü atema sorkartem aser loktiliba ajak nem shilem agidaksü," ta ashi.

Iba sentong ya Institute for Competitiveness and US-Asia Technology Management Center, Stanford University-i ayongzüka liasü.

Kasa report ajanga, contact tracing, lokti tendangba, home quarantine, nüngdakba medical osettem alemba, healthcare ajungkettsüba aser centre, state den district level ajak nung amalitepa inyakba ajanga iba wara prokba nokdangtetba dang masü saka health infrastructure-a ajungkettsüogo, ta metetdaksü.

Vaccination campaign ajanga mapang ajak nung taküm aika kümzüker, ajisüaka Covid

anema vaccination campaign ajangabo takümtem kümzüka dang masü saka rongsenkettsüung tsütsülena US dollar sen billion 18.3 takoksa angutsü aliba nokdangteta liasü, ta kasa report ajanga metetdaksü.

Ato kilonseri tekaraba nung lockdown sangdongba ajanga iba wara anema raraba nung takok ngua liasü, ta shia Mandaviya-i, mapang shidak nung lockdown sangdongba ajanga sorkari asalentong pongu- tendangba, contact tracing, treatment, Vaccination aser Covid Appropriate Behaviour (CAB) benokteta liasü, ta metetdaksü.

Paisa, sorkari health infrastructure ajungkettsütsü atema mera aika agia liasü, item rongnung Covid agi shirangertem atema yipten, mozü, N-95 masks, PPE kits aser medical oxygen agütsüba den külemi eSanjeevani Telemedicine service, Aarogya Setu aser Covid-19 India Portal ama digital amshiba lir, ta metetdaksü.

Ukraine atema UN bangzüng renemba nung India-i vote magütsü

United Nations, February 24 (Agencies): Russia-i Ukraine amak tenzüka sülen küm ka ajungba mapang UN General Assembly nung Russia dang Ukraine amakba anentsü takhangba agüja renemba bangzüng atema vote agütsütepba nung India-i shilem magi.

UN General Assembly nung vote shilem asemsü nungi shilem ana dak temai iba bangzüng pusema vote agüja liasü.

Ukraine-i sponsor asüba aser Ukraine pusemer co-sponsors 65-i benokba bangzüng atema Brihostibarnü UN nung vote agütsütepba liasü.

UN General assembly nung vote agütsütepba nung shilem magiba dak sendakba nung India nungi Permanent Representative to UN, Ruchira Kamboj-i, "Iba tebilemstü bentettsü atema lenmangji ken o jembiba aser yimtenren ajanga inyakba dang lir, ta onoki (India) teti ayongzüker," ta metetdaksü.

Kamboj-i, "Telok ana (Russia aser Ukraine) medeni tanga inyakyim ajanga iba mangatetep ya tajungtiba nung bentettsü asü?" ta asüngdang.

"Tanü renemba bangzüng nung shia aliba nükjidongtemji onoki metetogo. Asenoki

aginüba ama teti atema yimjung nükjidong ataloktsüsa masü saka kanga telatet, ibayongji onoki vote agütsüba nung shilem magi," ta lai metetdaksü.

Kamboj-i, Ato kilonser, Narendra Modi-i, 'tang putu ya raraba putu ka masü ta aiben jembio, ta ashi.' "Rara tesashiba akümba ya shingaia maginer. Iba ya bentettsü atema rondak süa ken o jembitsüla aser yimtenren ajanga inyaksüla," ta lai ashi.

UN bangzüng pusema vote 141 agütsü, iba bangzüng anema vote 7 agütsü aser linük 32-i vote agütsüba nungji shilem magi.

India-i tang agi trokbenbuba Ukraine rara dak sendakba UN bangzüng atema vote agütsütepba nung shilem magi.

Brihostibarnü UN bangzüng atema vote agütsüba nung shilem magiba linüktem rongnung India, China, Vietnam, South Africa, Cuba, Iran, Sri Lanka, Pakistan aser Bangladesh linüktem liasü.

Iba bangzüng ajanga Russia linük dang yimjung alitsü atema tangsa sepaitem Ukraine nungi aienshitsü akhangba den külemi rara ajanga takoksa angurtem atema ochi temeden agütsütsü aser ozüng alema inyakba atema ken o akatsü akhanger.



February 24, 2023 nü Bengaluru nung G20 FMCBG senden nung Union Finance Minister, Nirmala Sitharaman aser International Monetary Fund (IMF) Deputy Managing Director, Gita Gopinath na tangokba noksa nung angur.

Congress Party Tir Kharge-i dang CWC nung züngsemtem shimtsü

Raipur, February 24 (Agencies): Congress steering committee-i Congress Working Committee (CWC) nung züngsemtem shimtsü atema party Tir, Mallikarjun Kharge nem tashi agütsüogo, anungji CWC elections magitsü, ta party osang ka ajanga metetdaksü.

Hokolbarnü Raipur nung party plenary senden tetenzük

anogo nung iba telemtetba agiba sülen osangbenertem den jembidang Congress general secretary, Jairam Ramesh-i, "Ajaki melungtepa iba telemtetbaji agiogo," ta metetdaksü.

Chhattisgarh yimtiba tassenba, Nava Raipur nung 85buba Congress Plenary nung steering committee senden amendang iba telemtetbaji agi.

Steering committee senden nungji Congress party nung tongti lenir ana- Sonia Gandhi aser lar jabaso, Rahul Gandhi nabo medentet.

Senden nungji steering committee-i CWC elections ayongzüka agitsü asü CWC züngsemtem shimtsü atema Congress Tir nem tashi agütsütsü, ta o lemtepa liasü.

Linük Tir Murmu-i linük 5 nungi ketdangsertem kuli kaket agizük

New Delhi, February 24 (Agencies): Hokolbarnü Rashtrapati Bhavan nung sentong ka ayongzüka linük Tir, Droupadi Murmu-i linük pongu-South Sudan, Oman, Peru, Cambodia aser Seychelles nungi ketdangsertem indang kuli kaketem agizükogo.

India Tir ket nung kuli kaket agütsürtemji South Sudan Ambassador Victoria Samuel Aru, Oman Ambassador Issa Saleh Abdullah Saleh Al Shibani, Peru Ambassador Javier Manuel Paulinich Velarde, Republic of Seychelles High Commissioner Lalatiana Accouche aser Cambodia Ambassador Koy Kuong nung lir, ta Rashtrapati

Bhavan sangdong ajanga metetdaksü.

Ambassador Victoria Aru aser High Commissioner Lalatiana Accouche naprongla tetsür lir, aser iba dak sendakba nung Murmu-i twitter ajanga, "Yimtenren nung tetsürtem atema anogo tajung ka, kechiyong Tir Murmu-i South Sudan nungi Ambassador Victoria Aru aser Seychelles nungi High Commissioner Lalatiana Accouche na indang kuli kaket agizükogo," ta metetdaksü.

Laisa, yimtenren nung aika ajangshia alir tetsürtemi ketdangsüba tsütsü kanga tongtibang menden agizükba ngua kanga pelar, ta metetdaksü.



February 24, 2023 nü Chennai nung aliba AIADMK party headquarters nung taoba mapang Tamil Nadu chief minister asür J. Jayalalitha asoba anogomong nung AIADMK Interim General Secretary, Edappadi K. Palaniswami aser party lenirtemi asür nem akhüm agütsüba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ,

TSÜKLAI 25, 2023

Election yagi teimla magütsür!

Tangar asoshibo election agi shia temelenshi tajungba arutsü teimla tulu nung election agir aser aji oda arur, saka temulung ashitsüka kechianga mashi, jepaka nüktzü malu asenok asoshibo tang agiba election yagia temelenshi tajung ka arutsüsa kecha teimla magütsür. Atangji, temelenshibo arutsü saka tajung masü tamajung nung melenshiba asütsü. Aji oda, asenok asoshibo telok ka dang tamajungba aser telok ka dang tamajung ta mapa bolua vote enoktsüi ao malang ta asütsüsa tia ka nung yanü asenok election agia pei tenü nung nokdaksü, jembitsü aser inyaksü asoshi tatar yimsüsür shimtetsü. Mapabo jangratemtsüka saka election sülen ataloktsüba anogotem indang bilemdangra tezüdangtsüka bilemte. Nagaland state otsü ya küm 60 otsü dang lir, anungji shirnoki yanglu aser shirnoki rakसार temettdang saka asenok asoshi shisabolutsükaji shirnoki yanglutsüar, ajiang memetet asenok timatemer. Nagaland tenzükli nungi NNO, UDF, Congress, NPF aser BJP-NDPP teloktemi yimsü süa aruba mapang, state tasen aser alima tazü asüba mapang aritepa gari lenmang lapok, kaketreju aser mozü kitem yanglu, electric light aru, industry kar lapok aser tesem balala nung nüborsem nungdak anepalutsü asoshi deparment shia pei pei office lapokyonga ao ta asüba mapatem dak alaka tanü item lenmang aser kiojentem anepalu mesütem tamajung mapatem nungang Nagaland nungtugu kümogo. Küm 20 jakdang Nagaland nung tanga yimten telok kecha mali ajaklen Naga nungger ajak Congress dang liasü. Ashiko, arishi küm 25 teküpbok alirtemibo aji mamangtsüa akok. Iba mapang Nagaland tensa kanga mejungi liasü. Iba mapang adokba osangkaketem züngdangra anogo shia nisung kasetba aser rakzükratema osangtem agi sünga angutsü. Election-a iba mapangjisa tamajungba aser tesashiba agiba Nagaland otsü nung alitsü. Iba mapang gari lenmanga meyaglütet arem kümdaksü aser government school nung züngner mali aküm aser oda oda government mozü kidang nüborsem asoshi taneptsü angutsü teimla mekai kümdaksü. Iba ama temelenshi tajung bener marutetba government melentsü asoshi NPF government aru. NPF government-ji, atangji, nüborsem asoshi teimla tasen ka liasü, kechiyong parnoki Naga yimten tebilemte kokteta terenlok mapatem inyaksü nangzük. Ajisüaka, Congress dang nungibo NPF government-ang tamajungba amato küma adok. Ibaji Congress aser NPF telok majung masü saka Congress nung alirtemi NPF akümba agi liasü, anungji aonpu melen dang ashi aonbo kasa, tenü melen dang ashi nisungbo kasa, iba jagi temelenshi tajung marutet. Iba sülen temelenshi arutsü tenangzükba nung ano government tasen ka BJP aser NDPP government aru, ajisüaka ano iba government mapang nungbo terenlok mapa tajung kata merenemtet, nangzükbatem meinyaktet aser tamajung nung tangari kanga nungtugusa tetshitsüba government ka liasü. Ibaji BJP aser NDPP telok tai masü saka iba government-a küm 20 jakdang Congress mapang yimsüsürtem to agisa aniba government liasü. Item taintem den tasenpurtema kar züngsem saka kecha tepila ka mesayutet. Iba ama tensa tia ka nung, ano tang kasa nisungtemi anir election nung tokteper. Atangji, parnoki kechisüdirsüaka onok agiang ta akanger masü saka nüborsemi mulungra shimang ta mepishir, anungji nüborsem mulung. Ajisüaka, parnok melen tajungba shimtetsüsa parnok den toktepertemjia koda? Ashiko, Nagaland nung tang election nung toktepertem rongnung yimsü tesüdak purtem den tokepertemang ochimashiba aser tamajungba asütsüa akok. Itemji election nung toktepertemi bener aruba tebilemte masü saka nüborsemi bendenba tebilemte. Nüborsemi election-i aitsü purtem bushidang mashilen nungi takar akümerem aser tashiyim amshitetertem dang bushir, anungji asenoki bushiba angur. Item rongnungji asenoki kabosa shimtetsü, aji parnok asoshibo teimla saka asenok asoshibo ano taruba küm pungo asoshi teimla mali kümogo.

OLEMSABANG

Clean Election Nung Tamanger Ka Shilem

Dr. R. Zulu Jamir, Kumlong Baptist Arogo

(Yashi adok nungi...)

- Mulungsentsü temerük agi shilem agitsüla: Tenungsang ken 51:10 nung Davidi ashi, 'Oh Tsüngrem, kü dak temulungjang temerük ka poktetdakjang, aser shitakba asentenshi tanela ka kü dak poktetdakjang.' Naga nungeri clean election yimiyim ayima aruba ya election dak sendakba maparen ajak merüktetta agitsüba nükjidong lir. Alima nung kechisarena ajak timi azüoka ketdangsütsü Tsüngrem nisung nem nungloktsü Lipok 1:27-28. Tanü Naga nungeri Tsüngrem agitsüba khuret madak sarasadema ketdangsütsü melena; alima tashi, rongsen aser achi ajemba nem asen taküm anishidaksür. Tatem nung jenjang akaba nisung item jenjang makaba agi meyoka adoktsü. Ya kangasa tesasatsü masü no! Amangbapur shiai Tsüngremi agitsüba temeshiba aser temerükba yimli alima tashi aser rongsen nem mezüngmeshi mesüdaksütsüla. Tanü asen lima tejakleni asentenshia aotsü asoshi alima temetetba aser tasa tulu dangbo, temulungjang temerük agi telemtetba tajung agiba tashi tuluba asütsü.
- Alima nung ajak dang taküm taoba: Sayutsünger 9:4, nung ashir, 'kechiaser azü taküm kaji molusongzü tasü ka dang taoba.' Meimchir alima nung taküm aliba ya jenjang ulura ta amangbapur shiai angatetsü nungdaker. Tasür alangdak lima kecha nunga mali. Khristan lima nung lenir ka shimtetsü mechi, nüburtem rongnung rara aser mepetmesü ajanga taküm samaba ya amajok rongnung amajok. Mathi 16:26 nung ashir, 'Kechiaser nisung kati alma ajak ajangzükter pei taküm samara, pai kechi ajangzüktsü, mesüra nisung kati pei taküm melen kechi agitsütsü.' Atangji asen taküm ya bazaar oset ka ama sentak talang agi lalushiponga mayoktsüla. Tsüngremi agitsüba taküm nai mezüngmeshi süra, kenü anogo teyangluri na sensamasa doktsütsü. Iba anogo nungbo nai kanga sasatsü.
- Khristai agitsüba nüchiba wazüka Yuang: Yohan 8:36, nung ashir, 'Anungji techiri nenok nüji kümdaksüra, nenok shidak nüji alitsü.' Naga nungerji ken mapang ka amang nung nemtenba nüburtem liasü. Saka Yisu Khrista yimli ajanga tesangwa senmanger aküm. Joko asen nüburtem amang nung aliba temenen lartem masü saka nüji temeden tejangja anguba purtem lir. Anungji iba nüjiba ya alima yimya libaliro nem kokdaksübbaji tamashi ta ajatsü akok. Tanü Khristan state ka nung amangbapurtemi koba tangatetba nung election nung shilem agir! Asen meküta aliba kin ajunga asoshi asen nüburtem ya tanüdangtsü ka amai lir. 2023 election ajanga Naga senso nüburtemi alima tsüngdang tatishitsü kechi sayur! Atangji Khristan tajung ka temeden wazüka ayutsüji asen o aser mapa agi sayutetsüla. Iba election nung amangbapuri metet sümonga aibelen süra, nisung tsüngdang dang masü saka Tsüngrem tsüngdang nüji ayoker taküm asütsü.

O Tempang:

Khristan taküm ka asoshi shimang aser tanela tekümtet aser nüji ana ya alima nung yangertetsü ajak dang tongtipangtiba. Tsüngrem O nung ashir, "Kechiaser nisung kati alima ajak ajangzükter pei taküm samara, pai kechi ajangzüktsü, mesüra nisung kati pei taküm melen kechi agitsütsü" Mathi 16:26. India lima ya secular lima ka lir, kong Indian senso shia pei temeden tejangja wazüka yuja lir. Kecha political party, tamangba yimsü mesüra sobaliba tzüzüng ozüngi kati ka alentsü mesüra amokmerentsü makok! Saka tanü India lima Hindu tamangba yimsü ajanga tajemzükba (minorities) amokbanga aliba tensa ka nung asenok lia arur. Naga nungerji India nunger dang nungi kechisarena ajunga nung balaka lir. Asenok tereprangtsü sentsü nungi tenzüker; chiyungtsü, sobu solem, sobaliba, tamangba yimsü, oshi-oben, yimya tsüya aser libaliro ajunga India nunger dang nungi khenyongi balaka. Iba tensa nung asen temeden wazüka ayutsüji asen shilem.

Temeimba amangbapur tajungtem, Yisui Ozüng tulutiba ana agitsübbaji olen ana nung yamai shia lir, "Ne taküm ajak agi, ne tanela ajak agi aser ne mulungsentsü ajak agi nai Kibuba ne Tsüngrem meimang. Ya tulutiba aser mezüngbuba ozüng lir. Ibai mesükba tanabubaji ya lir, 'Nai ne kiyonger pei ama meimang.' (Mathi 22:37-39). Iba Lai o ya tamanger ka asoshi nüji kümdaksüba ozüng lir. Kibuba meimtsü aser ajak dang pei ama meimtsüla, saka temenen nung asonga aitsüsa alima yimya aser tasakecha nema asen temeden ala-ashia mayoktsüla. Iba ocet nung tim masüba olen kar tanga lira ni meyiba agir. Tajung langka danga lira iba olen ajanga asen nübur ajak moajang. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

AOR AJAK PEI KIDANG/PEI ALIBA TESEM NUNG SARASADEM TSÜ ABAM-i AYONGER

ANOGO : FEBRUARY 25, 2023

MAPANG: 7:00 - 10:00 PM

Tayongzükba: Sarasadem ya Tsüngrem chirtem asoshi tanela subotsü lir. Sarasadema nung meimchir tekolok aser shisatsü agi rajemtsü makokba tashi lir. Nüngtoko sayutsüngir Billy Graham-ashi "Ni Sarasademer, Ano Sarasademer aser Tanen Maka Sarasademer.

Ibai ajanga Mojinger tashi ajak Kokter". Asen lima nung 14th Nagaland Legislative Assembly Election atema ABAM aser Lim arogotemi sarasadem ayonga agiba den ano kija/kibongtemi kenunger aser medemer sasep nung sentongtem yanglua sarasadema arudagi. Asen sarasadem ajanga mojinger tashitem kokteta arubatem kuli aika ngua arur saka temenen sentongtema meimlabatem maneni atalokdagi. Iba ama mapang tamangertem longjemer sarasademtsü mapang tajung kechiaser Tsüngremi asen sarasadem langzüsü (1 Yohan 5:14).

Joko Election agitsü tongja tonga arudang tepangkatsü, taoksatsü aser 'tsüa' ta temulung ajak rongsaa kümdaktsüba tatalokbatem aika asen atepzüng nung ataloka arur. Item tamajung mapatem ya Tsüngrem dak amanger tiemba aliba State (Nagaland), Naga kin rongnungi mezüng Khrista Yimsü agizüker küm 150 tema amanga aruba Ao kin nungibo meimlar. Saka asen litsü nung shiruru shisatsü tener temenen mapatem inyakba angudang alimai süngmanger. Tsüngremia asen Aor dak kodaka reprangya alitsü na? ta aroka shisadangdi. Khuret ulura kümogo. Asen mapatem ajanga Tsüngrem jashidaktsür saka temeim agi Tsüngremi asen den jembir. Asenok atapisüa alitsü mapang masü. Ali wadang teinyaktsütem aika den mazüngi liaka Tsüngrem den mapang endoktsü jangradi.

Tsüngremer tejembiba ola angaa, ABAM-i **February 25, 2023**, Aor ajak pei kidang/pei aliba tesem nung **7:00 - 10:00 PM**, sarasademtsü ayonger. Mazüngi liaka ghonda asem (3) yabo mulungsoa agiteter sarasademtsü mepishir. Sarasadem mapang item ya aroka shisadanga onüktem balala bendena asen khuret aser temepeshiba Tsüngrem dangi bendi arungma:

- Nüngdak ajak talubusa anguba mapangji Election Mapang ya lir. Rongsen temai jateta adoker. Sen talubusa amshiteper. Temesepba chiyungtsütem peria aser mela mela-a angur. Aikati ya jangratemtsü mapang ka amai bilema pelateper saka memelenshira election nung ochimashi mapatem inyakba khuret asen dangi meyipa arudangbo sasatsü. Süra, election mapang na/ni aser ner/ozü kibonga koba ama tangatetba ka nung nokdaka lir? ta shisadanga tim masüba lenmang nung jajaya lira tatok meshia Tsüngrem taochi bushidi. Tsüngremi Adam dang "Na Kong Lir?" (Lipok 3:9) ta asüngdangba ama tang election mapang kesa tasüngdangba asenok dang asüngdangdang, nüma tanga pelasete langzütetsüsa tim lenmang nung jajadar asü mesüra Tsüngrem nungi jena aotsüa jenjang nung ali?
- Tsüngremi tindanger meimer. Kibuba tsüburtemi indang indanga jajar aser ochi jembia ochi mapa inyaker (T. Ken 15:2). Election mapang tindang shisatsü tener alima yimsüsür shimba nung ochishia shilem agitsü bilemdar asü masü? Ashikülak shisatsü nem kokdakja ambangyim aser temeim mulungjang makai meyipshishia shilem agittem rongnung asenok matentsü asoshi Tsüngrem nungi tashi meshidi.
- Alima yimsüsür menden nung amentsü tejangraba nung election nung tokteptsü mulungteter alir Candidate-tem aser political party balala nung lenirtem, polling station balala nung achaayangtsü atema shimteta aliba lenirtem nem Tsüngremi tangatetba aser terajem shisatsü den Tsüngrem akhümtsüba mapatem inyaksü asoshi sarasademtsüdi (1 Timoti 2:1-4).
- Election mapang asen lima nung kati ka anema mapa tamajung inyakba, telok balala tsüngda raratepba, taküm mapayui tepsetepba, ki-ojen raksaja rongdoktsüba, long agi ontepba, gari rongdoktsüba, kati ka taochi makai tepsetepba azü tokshiba, temesepba chiyungtsü chia jemer jabujari mapatem inyakba, item amala mataloktsü sarasademdi. Kibuba tsübuba tanela aliba ajanga temenen ajak sempatsü (A Shin 8:13) anungji Aor ajaki Tsüngrem tsüba kümdakjang ta sarasademdi.

Temeim adianutem, arung asen tai temenentem asoshi tatok meshia külemi sarasademdi, külemi lumidi, külemi apudakdi, külemi nüktzü yimdi. Sarasadem nung tashi lir anungji Tsüngrem dak amanger tebang shia nungi ola adoka ghonda asem tesem balala nung asenoki sarasadema Tsüngremi langzüsü ta tamang nung ajaki shilem agitsü ayonger.

Sd/-

Rev. Dr. Mar Pongener
Executive Secretary, ABAM

Sd/-

Rev. Temshi Longkumer
President, ABAM.

Nüngtugu Laishir, Dr. Michael Heiser cancer tashidak agi süogo

February 24, 2023: Nüngtugu Laishir aser kaketzülur, Dr. Michael Heiser February 20, 2023 nü cancer tashidak agi asüba sülen nisung aikati mangyim jashi lemsatepdar; pa arrshi küm 60 ajungtsü hopta ka dang lia alima nungi pila.


Tejen Lai puti meteter mongin, Dr. Michael Heiser February 20, 2023 nü asüba osangji pa indang official Twitter handle ajanga sangdonga liasü.

Dr. Michael Heiser indang Twitter handles ajanga, "Asenoki meima aliba adianu, shisashir aser tembar Dr. Michael Heiser 20/2/23 nikongdang 3:45 ako nung asen tenük agi manguba yimli nung alitsü ogo," ta metetdaktsü.

Pa ya stage 4 pancreatic cancer agi shiranga liasü.

Pa asüba sülen nisung aikati social media ajanga mangyim jashi lemsatepdar. Nisung kati social media ajanga, "Dr. Michael Heiser süogo. Tesünep nung anisüngzükang ta sarasademtsür. Pa ajanga Laishiba teratet melenshi," ta lemsatep.

Ano nisung kati, "Pa



Dr. Michael Heiser

Kümtetdakba Kabu nung agütsür. Nü den majurutep anisüngzükdakjang ta tashi salem," ta lemsatep. sarasademtsür. Pai inyakba Pai züluba kaketterm mapatem ajanga Laishiba rongnung 'The Unseen Realm: Recovering the Supernatural Worldview of the Bible', Pa dang pelar," ta lemsatep. 'Supernatural: What the Bible Teaches about the Unseen World - and Why It Matters', 'Reversing Hermon: Enoch, the Watchers, and the Forgotten Mission of Jesus Christ', 'Angels: What the Bible Really Says About God's Heavenly Host', 'How to Study the Bible' aser 'John's Use of the Old Testament in the Book of Revelation: Notes from the Naked Bible Podcast' kaketterm densema lir.

Dr. Michael Heiser-i kaket aika züluogo aser kaket aika Laishiba aser tanela tsütsü sendakba kaketterm lir. AWKNG School of Theology-i twitter ajanga, "Tanü onoki Dr. Michael S. Heiser nem tetushi agütsü. Yashi nikongdang 3:45 ako nung pa Kibuba yimli nung alitsü ogo, aser tang pa asen Kibuba temeim Kabu nung lir. Pai taküm junga aliba aser senmang tajung yutsüba atema onoki pa nem akhüm

ANOGO ABEN TSÜNGREM DEN

Nai Lemsateptsü Asü ?

T. Ken 67:1-7

Iba ken zülur memetet saka alima rangpen mangdang akar kati iba ken zülu. Tsüngremi Pa moatsü, aser Pai iba temoatsüji ajak den lemsatepnü. Pai zülu, " Tsüngremi onok dang aochiang aser onok moajang, aser ne tejak onok dak saklokdakjang"(t.2). Ibai putir kati moatsüba osü mesüker. "Kibubai Pa tejak ne dak yalokjang, aser ne dang yimlibilemang"(Züng 6:24,25).

Tekong 2 nung ken züluri "onok" asemnen tashi amshi. Pai Yihuda nunger indang ashi, saka idakji matem. Pai tekong 3 & 4 nung kintem amshi. Tejen Lai nung Yihuda nungeri Tsüngrem moatsüba parnok atema dang ayutsü aikati bilem. Parnok imelemsatepnü. Tsüngrem sentong memesük ! Kechiba Pai Abraham aja ? Alima ajak dangi osangtajungji aotsü atema. Kechiba Yisu asü? Osangtajung osang alima ajak dangi aotsü atema.

Kechiba Kibubai asenok moatsür? Asenoki osangtajungji tangar den lemsateptsü asoshi Tekong 2 nung sarasadema ama sarasademtsü asenok kecha tebilemetsü mali: " Tsüngremi onok dang aochiang, aser onok moajang, aser ne tejak onok dak yalokdakjang." Nai tangar moatsütsüsa na temoatsüba süner asü? Tsüngremi asenok tama moatsüba kuliji aji lir.Kar sarasadem langzür asenok asütsü asoshi Tsüngremi asenok sarasadem langzür.

Kin ajak dang Tsüngremer tekümtet metetdaktsüba nungi adokba mapaji tenüng asangbaji lir. " kintemi Na sangdakjang, o Tsüngrem; kin ajaki sangdakjang"(t.3). Iba tetezü Israeli dang masü. Bendangertema dena lir. "Kintem peladakjang aser tepela agi ken tendakjang;"(t.4)."kintemi na sangdakjang(t.5)

"Idangji alui pei terenlok süngjang tangogo. Aseni Tsüngremi asenok moatsütsü" (t.6,7). T.ken züluri ashir, "Kibuba, ni tangar moatsütsüsa ni moajang". Pa tangar asoshi temoatsü aküm, anungji koda tesüngmangtsü.

Na Tsüngremi moatsür rongnung ka asü? Nai lemsatepra, na temoatsü ka asütsü Tsüngremi moatsütsü. Pa indang tangar dang ashiba ajanga Pa taochi metettang.

SANGOKTSÜR

Dimapur area Aor Ordained minister aser Pastortem Indisen Baptist Arogo nung sarasadem mensem agiba mapang yamai sangdong ka agütsütsü lemtet:

Mapang talangka Ao yimli, arogo, yimden asoshi sarasadema ochishir, Tsüngrem tsübur aser nübur meimba lenir shimtsü küm 40 - 50 Tsüngrem O dak ajemdaker nüburtem anir aruogo. Anungji tanüa kasajisa onoki nenshia tayongzükba kar agütsür.

Mezüngbuba nung, asen tamang raksatsüsa election nung shilem tajung agiang. Na Khristan ka ama Tsüngrem yimli yangluloker aser kümzüka ayur ka süang. Aorji Tsüngrem yimli züindaktsütsü shimba kin ta metetang.

Tanabuba nung, tanü nai iba election nung rongsen aika bendenaka, na shirangba aser timtemba anogo nung item rongsen jagi na manüptsütsü. Anungji Yisu dak rangloker merüka shilem agitsü, election mapang sen temeshi ta ayimoktsür.

Tasembuba nung, election nung tashiyim amshitepbaji temenen lir. Onoki ibaji aitsür. Election nung raraji nai takok nguaka, election temerbo yimerbo yimersa asütsü, adianubo adianusa asütsü.

Onoki lung agi ontepba aitsür. Onoki yi amshiba aitsür. Onoki injang prangbong amshiba aitsür. Onoki coup asüba aitsür. Onoki azü tokshiba aitsür. Anungji adianu meimtepa aser sarasadema dang election nung shilem agidaktsünür, ta onok Tsüngrem tenzükertemi ayongzükur.

Temeshibai kin ka ajungketer, saka temenenji taaktsüka aser iba jagi kin ka lurepdaktsür (Api. 14.34). Ao yimli, lateta tata menden shimtsü asoshi ghonda ishika dang lir. Anungji ne Khristan tamang meraksai Tsüngrem yimli kümzüka ayuba den rongsen yong ne temeden meyokdoki shilem tajung agitsü sarasadema Tsüngrem lartemi ayongzükur.

**AO OSHI ANGAZÜKDAK:
TANÜ ANGAZÜKTSÜBA OJANG**



Pa

(pronoun) tebur tangar ka (he)
* Pa tasütait asangur ka lir.

Pai

(pronoun) tebur kati inyakba indang ashiba
(indication of his action)
* Pai lokti asoshi mapa tajung aika inyaktsü.

OLONG PAITEP # 6439

1		2				3			4
						5			
6				7					
			8	9					
									10
	11		12					13	
14									
			15			16			
			18						

TIPIEN

- 1. Ajaki metetba nisung - (8)
- 5. Temechi - (4)
- 6. Saku - (4)
- 7. Temalen-i kao - (3)
- 8. Pei / Ainer - (6)
- 11. Aonung tesangwa - (6)
- 15. Rong tapu ka - (3)
- 16. Sü apuba lisu - (4)
- 18. Milen-i agütsüba - (8)

LANGTSÜNGLEN

- 1. Aginü - (6)
- 2. Mamatsü agütsüba shiruru - (5)
- 3. O taret - (5)
- 4. Kilong masü - (4)
- 9. Tashi balaka - (3)
- 10. Ajak - (6)
- 12. Temeshi züngdangba - (5)
- 13. Ozütem yimzüdak - (5)
- 14. Kilitsü atema alizüker ayuba - (4)

OLONG PAITEP # 6438 TELANGZÜBA

TIPIEN:

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN:


- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Japan nunger yimya nung kaket agi kechisarena purapaiteta shiruru, ozü, naro amala yangluba dang engraji agi 'Origami' ta ajar. Yamala tasaji amshia kaket agi yangluba danü (Origami Cat) ka yangi noksa nung angur. Koda jangratemsüka!

Noksa nung meputepi aliba 10 bushiang



DEBTS RECOVERY TRIBUNAL GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/431/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

**CANARA BANK
VS
MESSRES RAHUL COMMUNICATION**

Exh. No.: 2922

To,
(1) MESSRES RAHUL COMMUNICATION
A proprietorship firm Represented by its proprietor, Mr Subodh Kumar Singh office at Nyamo Lotha Road Dimapur 797112 Dimapur, NAGALAND -797112

(2) MR SUBODH KUMAR SINGH
SON OF LATE RAM NARESH SINGH RESIDENT OF YEHOVI COMPLEX HOUSE NO 54 DIMAPUR 797112 DIMAPUR, NAGALAND -797112

(3) MR CHANDRA SHEKHAR SHARMA
SON OF HARIRAM SARMA RESIDING AT CHARU LIFE LINE M P ROAD DIMAPUR DIMAPUR 797112 DIMAPUR, NAGALAND -797112

SUMMONS

WHEREAS, OA/431/2022 was listed before Hon'ble Presiding Officer/Registrar on 20/02/2023.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 2558107.89/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 28/03/2023 at 10:30A.M. failing which the application shall be heard and decided in your absence.

Given under my hand and the seal of this Tribunal on this date: 22/02/2023.

Signature of the Officer Authorised to issue summons.
Assistant Registrar
Debts Recovery Tribunal
Guwahati

Note :Strike out whichever is not applicable.

Centre-i Meghalaya nem sen aika agüjaka terenlok mali: PM Modi

Shillong, February 24, 2023 election nüboyimba sentong ka aser kenten ajungkettsü (Agencies): Tesüiba küm aika nung ashi. "Senji kongi ao meranger. Ni nübortem dang Meghalaya nem sen aika Lanurtem mapa manguba putu 19 buba nung Khasi agütsüogo saka nübortem indang ashir aser mapa alidakji nung tanishir Tirot Sing indang ajangzüksüsa terenlok kecha ochimashi lir" ta paisa ashi. otsü metetdaksüogo" ta paisa ashi. "Item onüktem nung Narendra Modi-i ashi. ajemdaker nübortemi state aser ash. "Meghalaya nem sen aika Centre nung BJP sorkar cherry blossom ya Japan nung agütsüogo saka gari lenmang akümtsü telemtetba agiogo. dang nüngtugu ama bilema liasü mesüra school/college mesüra BJP-i northeast nung lisopurtem saka ni kodang Mann ki Baat mozü ki maliba osangtem ni atema teti bilemetsür, ta Modi-isa nung Meghalaya indang cherry nübortem dang nungi angashir" shisem. blossom indang jembli, nübortem ta PM Modi-i Tura nung "BJP-i teti lisopur sobaliba süngmangtep" ta Modi-i ashi.

Bendanger azüoktsü atema Manipur-i arrtsülen police outposts 34 lapoktsü

Imphal, February 24, 2023 CM Biren-i iba osang tepuokdak lir, detention center (Agencies): Manipur kübok metetdaksü. balala nung 105 lir aser nisung arrtsülen police outposts 34 Ministry of Home Affairs- 180 bail nung chiokogo, ta paisa lapoktsü aser iba ya kidanger i arrtsülen police outpost tem ash. lapoktsü mulunga agizükogo, Myanmar den arrtsüa aliba linüktem nungi nisungtem aruba Churachandpur district nung azüoktsü atema lir ta Chief taküm February 5 nü police-i Minister N Biren Singh-i ashi. Manipur-i Myanmar nung nisung 10 Imphal nung 12 buba kilometre 398 agi arrtsütepa lir. apu. Parnok ya ozüing alema Opposition Congress MLA January 1, 2012 nungi aruba liasü aser parnok rongnung tetsür 6 dena liasü, Kangujam Ranjit Singh-i Myanmar nunger 393 puogo. ta Manipur CM-i metetdaksü. asüngdangba ka langzüdang Parnok 1 meyipa yok, 107

GOVERNMENT OF NAGALAND

DIRECTORATE OF ECONOMICS & STATISTICS

NAGALAND : KOHIMA

No. ES/RBD-8/1/2001

Kohima, Dated the Feb. 2023

PUBLIC NOTICE

It is to inform the general public that Shri **NIRANJAN CHETTRI** S/o **Lt. SANTA BAHADUR CHETTRI** a temporary resident of P.W.D colony, Kohima and a permanent resident of Salbari village, Siliguri, Darjeeling, West Bengal is issuing Birth & Death Certificate illegally. Therefore, the public are requested to be vigilant and desist from obtaining Births & Deaths Certificate from the person as mentioned above.

Further if any discrepancies or suspicious in Births & Deaths Certificate are detected, the undersigned may be informed for initiating appropriate action as per the RBD Act 1969.

The Birth & Deaths Certificates issued by Shri **NIRANJAN CHETTRI** stand cancelled.

Sd/-

Director

Economics & Statistics
&Addl. Chief Registrar of Births & Deaths
Nagaland : Kohima.**TENGANGTET TSÜNGREMLAR****REV. SOSANGMEREN SÜR KÜM 10 ABENSAR**

"Aser shirnoki Tsüngrem meimer, parnok asoshi Pai mapa ajak tajungba dang inyaker ta asenoki metet".
- Rom 8:28



ASÜR REV. SOSANGMEREN
25/02/2013 - 25/02/2023

Kibuba den alitsüsa yangsemer küm ter tashi arundang; nai toktsüba temeibatam rongjener. Saka nai tsüngchia Tsüngrem tenzüksü metsü rema toktsüba onoki kodanga mamatoker aser iba nung onok mulung süngzüker.

Nai Tsüngremer taochi aser tekümtet osang tajung tasünü tashi ajaklen sayuba, tanü onoki Kibuba nung bilemteter.

- Temeim Kinungertem.

SÜR KÜM KA AJUNGBA ANOGOMONG

ASO:
March 16, 1922

ASÜ:
Feb. 25, 2022

Lt. Mrs. Nüngsanglemla (Mongsenyimti)

Oja, tanü anogo ya onok asoshi tammangtiba anogo ka; nai onok rongjenseta aser temelung raksaa yutsür na teti asoshi anisüngzükdak limai aoba anogo memeteti süia tanü küm ka abensar. Onoki na menungrar aser nü mapa tajungtem bilemteter. Nai maneni kodak nungi onok moajangma.

- Kodanga mamatetba chirmurtem,
semchirtem aser anükapangtem.

Wang Yi-i Putin ajuru, China-Russia tesendaktep tajungba akumer

Moscow, Tsüklai/February 23 (Agencies): Russia Tir Vladimir Putin aser China indang diplomat Wang Yi na ajurutepa jembishinü akaba ajanga Kremlin nung Russia aser China tsüngta tesendaktep junga aliba sayur aser linük ana tesendaktep junga alitsü tongtipang ta tushia jemi.

Bodhbarnü Wang aser Putin na ajang-ajanga teka amtepa salemba aser langpang nung mena aliba noksa tem prokshia liasü. Ano noksa kar nungbo Chinese Communist Party indang most senior foreign policy ketdangsür Wang ya Russian Foreign Minister Sergey Lavrov den külemi jajaba nguogo.

Wang-i European linük aika sema jajar tatem nung Moscow semdangba ya Putin-i par sepaitem dang kidanger linük, Ukraine amaksü totuyuba agütsür küm ka ajungtsü anogo ishika lia arur, kong nisung meyirijang aika süogo aser ano million aika linük balala nung jenshi aser Ukraine nunger jila aser yimti aika raksatsür lir.

Iba rara yagi Russia aser alima nung liberal democracy tsüngta telesa tali tuluba adokdaksü, talisa anüolen linüktem den, shirnoki Ukraine busemer aser Moscow nem tenokdangba jenti agüja lir. China aser United States tsüngta tesendaktepa tamajungba akumer.

Alima nung tensa tamajungba akumba indang athishia jembidang, alima nung tensa tajungba kumdaksütsü asoshi People's Republic of China aser Russian Federation tsüngta amaliteptsü kanga tongtipang lir, ta Putin-i ashi.

Linük ana tsüngta tesendaktep ya jenjang tasen ka tongtetogo, ta pai ashi, anungji China Tir Xi Jinping-i senden ka atema kobi melie Moscow semdangtsü kuli sayur. Xi ya China tir akumba sülen tena terben dak tali ajurutepa lir.

Beijing-i rara atema Moscow aija mali, koba dang Moscow-i "special military operation" ta ajar aser tatem makai amalitep akatsü asoshi China nung Xi aser Putin na ajurutepa mapang tatsüka lir iba rara tenzüker.

China-i Russia nem nok-nü mesüra danga teyari agütsütsü akok ta US aser NATO nati tawa shiogo, saka China-i iba ama sentong mali ta ashir.

Moscow aser Beijing nati multipolarity aser democratisation of international relations nungitsü nungdak, ta Wang-i ashi, koba US-i alima amokbanga lir ta angatetba den tokteptsü asoshi linük anaprong nükjijong lir.

"Chinese-Russia tesendaktep ya danga linük kata anema masü aser danga linük katia teka sangshitsü makok," ta pai ashi.

Bodhbarnep Wang-i Russia indang foreign minister den ajurutepa jembishinü liasü. "Asen tesendaktep maneni renloka aor aser alima nung yipru tesashi liaka kati ka tejangraba atema jembitsü renema aliba sayur," ta Lavrov-i ashi.

Wang-ia Beijing-i Russia den tesendaktep tajungba akumtsü asoshi rangloka lir ta telangzüba agütsü. Ukraine asoshi China indang yimjung sentong indang jembishinü maka, ta Russian foreign

ministry ajanga ashi.

Kremlin den rara mesüba ajanga rara adoka aliba atema US aser NATO tenüing asentsüla, ta Moscow-i ashiba nung China nokdaka aliba sayu.

Iba melena Russia-i China akang-akanga busema nokdaker, shirnok Taiwan aser danga ken o mechi US den tensa mejungi lir.

Ukraine nung rara ya taoba küm February 24 nü tenzüker aser World War II sülen Europe nung rara tulutiba akum.

Iba rara tenzüker küm ka ajungba nungtem nung züngsem 193 aliba UN General Assembly senden ka Bodhbarnü amendang, Russia-i amakba ya UN Charter aser international law nung aibelenba ka lir, ta UN Secretary-General Antonio Guterres-i aija ashi.

Ukraine aser par busemer temi benokba pangzüng ka atema General Assembly nung Brehostibarnü vote agiteptsü lir, koba agi UN Charter den lirumedema akok tashi tekeratiba nung yimjung aittsü nungdakba shia lir.

"Litsü-lika mesüra yimtenren tsütsü shinga linük anema züngsem ajaki tashiyim mamshitsü," ta iba Charter nung shia lir.

Quarter asem jungnüa indang teyari nguteta Russia den tesendaktep makai azüngmeyaka yutsütsü Ukraine aser par busemer teimla lir.

Moscow asoshi danga mera kecha mali saka ozü linük kumzüka ayutsü asoshi mitkar tashi amshitsüsa akum, ta Russia indang UN ambassador Vassily Nebenzya-i assembly nung shia liasü.

Papua nung nisung teku tepsetba sülen security akangshiogo

Jakarta, Tsüklai/February 24

(Agencies): Papua kübok Wamena jila nung tanur ka pura oba olulu osang prokshiba sülen longkak aiterem aser police na tsüngda mangatetep adok aser iba lendong nung nisung teku asü aser nisung 14 yirua liasü, ta local media aser official sangdong ka ajanga metetdaksü.

Tensa azüoktsü atema police aser military densema security personnel 200 dak tema iba tesem yagi yokogo, ta police-i Hokolbarnü metetdaksü.

Tanur ka pura aoba olulu osang angazükba sülen local tem kanga mit adoka Wamena police station nung long agi aon tenzüker, kong nisung pur aoer asütsü ta temulung melemba nisung ka sota liasü, ta Prabowo-i ashi.

Olulu osang prokshiba sülen tensa mejungi aküm aser police-i tanur ya pur mao aser kumzüka lir ta kuli agütsüdadaksütsü atema tsürapur jaoka liasü. Ajisüaka iba yagi nüburttem mit adokba mesüngjendaksütet aser parnok iba tesem nung aliba kitem aika rongtokja liasü, ta police otongdar-isa ashi.

Local news outlet Jubi TV-i ashiba agi, local police ketdangsür kati nüburttem dang süngjemshitsü atema ayongzüker ajisüaka tensa tamajungba

küma ao.

Papua ya taoba mapang Indonesia yimsüsüa aliba Netherlands kübok liasü aser 1969 küm United Nations-i teyari agütsüba referendum ka ajanga Indonesia tazüokba küboki aita liasü. Iba referendum nung nisung 1,026 nem dang shilem agidakja liasü.

West Papua National Liberation Army-i küm aika nüjiso atema rara arudar aser tawa iba telungpur telok yagi New Zealand nunger pilot ka pura oba sülen tensa mejungi aküm. Indonesian military-i ashiba agi, pilot sang chiochtsü atema sensaksema aliba tamakok ngura parnok "law enforcement operation" ka benoktsü atema renema lir.

Papua ya alirongsen peria aliba tesem ka lir, saka Indonesia kübok ajak dang sensaktiba tesem ka lir.

2019 küm Indonesia indang military-i nüjiso atema raratem raktoktsü merangba mapang Wamena nung alir nisung 35,000 shi pei talidak ki toktsür aotsüsa aküm aser parnok rongnung timba tanurtem liasü. Item telungpurtem yagi 2018 küm December ita lenmang yanglua aliba project ka amak aser nisung 17 tashi tepseta liasü.

Office of the Chief Electoral Officer Nagaland : Kohima



THE YOUNG ARE INTELLIGENT AND KNOWLEDGEABLE. THIS IS AN OPPORTUNITY FOR YOU TO EXPRESS YOURSELF. THE OFFICE OF THE CHIEF ELECTORAL OFFICER, NAGALAND WILL HOLD CHALLENGES FOR ESSAY WRITING OF 1500 -2000 WORDS AND SHORT VIDEO OF 3- 5 MINUTES ON THE TOPIC " MY OPINION OF ELECTIONS IN NAGALAND"

Last date for the entries has been extended upto 26th February, 2023

All interested students of schools and colleges in Nagaland may submit their entries by 6:00 PM to ceonagaland.itcell@gmail.com

- WINNERS WILL BE SELECTED FROM EACH CATEGORY AND AWARDED CERTIFICATES AND CASH PRIZES.
- ALL PARTICIPANTS WILL BE AWARDED CERTIFICATES.
- ALL THE VIDEOS AND ESSAYS WILL BE UPLOADED IN THE CEO'S WEBSITE AND SOCIAL MEDIA HANDLES FOR WIDE PUBLICITY.

For further details visit ceo.nagaland.gov.in

Jordan Pickford-i Everton den tenangzüktepba yanglushi



Tsüklai/February 24, 2023

(Agencies): England goalkeeper Jordan Pickford-i Everton den tenangzüktepba tasen yanglua pa tanga club kati aotsü akok ta bilema aliba jangjashitsüogo.

Arishi küm 28 tain asayar den tenangzüktepba yanglur aliba tembangsü atema ita 12 anunga aliba mapang pa tanga club aika densema Tottenham-i aotsü atema sendaktepa liasü aser tenangzüktepba nung sign mesüaka pai Goodison Park nung dang asayatsü atema mulunga agizükogo.

Pickford, shiba 2017 küm Sunderland nungi pound million 30 yong alizük, pa Everton nungi 200 ben dak tali asayaogo aser manager tasenba Sean Dyche-i pa maneni renlokyonga otettsü ta tamang akar.

"Pa asayar kanga tajung aser tang tashi nungbo pa iba football club tenzüker tajung ka lir aser maneni yamaji asütsü," ta Dyche-i ashi. Pai aniba team ya tang jenjang 16buba nung lir aser relegation zone nungi point ka agi dang pilar lir.

"Onoki pa nem maongka agütsüba agizüktsü atema pai

mulunga lir anungji iba ajanga lenisüba tasen kübok pa jangradma asayaba sayur. Pa asayar tajung ka lir anungji onoki pa maneni club nungi asayadaksüner.

Dyche lenisüba nung Everton puri home game anaprongla kokogo aser Honibarnü Aston Villa den asayaba mapang kidang asaya asembuba atonga akoktsü atema merangtsü.

Ajisüaka Arsenal o Leeds naprongla akokba asaya ya club kiburtemi merprangtet, kechiyong parnok lendongi aitsü akok ta osang agütsüba sülen hopta tsüngda parnoki ground-i arua club asaya merprangi arudar.

Dyche-i ashiba agi, pa aruba sülen board den sensaksemba tajungba kümogo, ajisüaka club nung lokti tentet ajak ka kuma longjemdaksütsü nungdakba lemsatapa liasü.

"Tesendaktep mejungi lira sendakteptsütsü merangtsüla. Fan tem ya club nung kanga tongtibang shilem ka lir ta ni angateta lir aser ni iba indang tali angazükdar aser iba ya akümstübuttsü nungdaker," ta pai ashi.

Southampton manager inyaktsü Selles shimogo



Tsüklai/February 24, 2023
(Agencies): Relaget asütsü ana nung aliba Southampton team-i interim coach Ruben Selles nem season tatem tashi manager mapa bendanktsütsü atema shimogo, ta Premier League club yagi Hokolbarnü metetdaksü.

February 12 nü Nathan Jones mapa nungi anentsüba sülen Spain nunger coach Selles-i ken atema coach mapa bener liasü. Asaya 14 nung tekuben tashi tamakok ngua Southampton pur league table nung ponglang nung aliba mapang Jones mapa nungi anenja liasü.

Selles lenisüba nung Southampton puri taoba Honibarnü Chelsea goal 1-0 agi kokogo. Manager mapa agizükba sülen pa lenisüba nung Southampton pur mezüngbuba Honibarnü Leeds United den asayatsü.

World Cup break atongtsü

anogo ishika lia November ita Ralph Hasenhüttl melena Jones shim aser pa anogo 95 sülen mapa nungi anenja liasü.

Selles ya iba season nung Southampton indang coach tasembuba lir aser November ita Hasenhüttl mapa nungi anentsüba sülen pa interim coach liasü. Pa lenisüba nung Bodhbarnü Sheffield den League Cup nung penalty metsütepba asayaba asaya asaya-a liasü.

Selles ya 2022 küm July ita Hasenhüttl indang assistant ama Southampton nung aden. Pai taoba mapang Valencia indang under-18 team aser Greece, Denmark aser Azerbaijan team coach mapa inyakogo.

Asaya 23 nungi pongu dang akokba sülen Southampton pur Honibarnü Leeds den masaya tsüngda relegation temai atutsü atema points asem nungdaka lir.

Pat Cummins tasembuba Test nung masayatsü

Tsüklai/February 24, 2023

(Agencies): Australia captain Pat Cummins India den tasembuba test asaya nung masayatetsü, kechiyong pa tetsü temang manemba ajanga kidangi meyipaogo.

Pa maliba mapang Australia team Steve Smith lenisüba nung Indore Test asayatsü koba March 1 nü tenzüksü.

"Ni India-i meyipa marutsü atema telemtetba agiogo, kechiyong kütsü temang manemi lir aser la palliative care nung lir. Ni ozü kinungertem den aliba tajungba aütsü ta bilemer. Cricket Australia aser kü teammate temi ni kanga nongita yariba atema kanga pelar. Nenoki angatetba atema kanga pelar," ta Cummins-i ashiba Cricket Australia sangdong ka ajanga metetdaksü.

Kasa mapang nung Steve Smith, shiba tanabuba test tembangba sülen pa kinungtsü Dani den Dubai nung anogo pezü mapang intokogo, pa Bresthostibarnü Delhi nung Australia squad nung densemogo.

2021 küm tanaben vice-captain asütsü shimba sülen Smith lenisüba nung Australia team tang agi tasembubaba asayatsü. Adelaide nung test ana asayaba mapang Cummins masayatetsüsa akumba sülen Smith lenisüba nung team asaya liasü.

2014 küm nungi 2018 küm tashi nung Smith lenisüba nung Australia team test 34 asayaogo, kong tatemsa 2017 küm India semdangba densema lir. Iba asayamung nung pai century asem yanglua liasü.

Tasembuba test masaya tsüngda pacer Josh Hazlewood aser opener David Warner na yiruba ajanga Australia team nung tetsükdaksü adokogo. Hazlewood yiruba sülen Australia-i meyipa aotsü aser kasa mapang nung Warner tanungba test ana nung masayatetsü. Left-arm spinner, Ashton Agar-a kidangi meyipa aotsü.

Ajisüaka Cameron Green aser Mitchell Starc na asayatetsüsa kümogo aser iba ajanga team nem tashi agütsütsü.

BILEMDANGANG

"Shirangeri inyaktettsü
mapa kecha mali."